

بِسْمِ اللَّهِ الرَّحْمَنِ الرَّحِيمِ



Khutba Jummah

Hazrat Khalifatullah Muir. A. Azim (atba)

21 Août 2020
01 Muharram 1442 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lors :



Du'as (Invocations) (Pt. 7)

يَا أَيُّهَا الَّذِينَ ءَامَنُوا اذْكُرُوا اللَّهَ ذِكْرًا كَثِيرًا
وَسَبِّحُوهُ بُكْرَةً وَأَصِيلًا

Yaaa-'ayyuhallaziina 'aamanuz kuru-laaha zikran-kasiiraa; Wa sabbihuuhu bukrataww-wa 'asiilaa.

Ô bane croyants! Pense Allah beaucoup et faire So éloges le matin et le soir. (Al-Ahzab 33 : 42-43)

Dans ene Hadith ki trouve dans Sahih Muslim, le Messager d'Allah (saws) fine dire : « Kan bane dimounes rassembler pour mentionne Allah Le Très-Haut, bane anges faire le tour autour de zot, miséricorde enveloppe zot, la tranquillité dessane lors zot. Allah Le Très-Haut faire mention de zot auprès bane ki trouve autour de Li. »

Alhamdulillah, Summa Alhamdulillah, nous fine rentre dans ene nouvo l'année Islamique, l'année 1442 Hijri et aujourd'hui nous le 1^{er} Muharram. *Alhamdulillah, Summa Alhamdulillah*.

Couma zot tous conner, le *Muharram* li ene de bane quatre mois sacrés, ensam avec *Rajab*, *Dhul-Qaddah* et *Dhul-Hijjah*. Pour le musulman, c'est le début de nous nouvo l'année Islamique. Donc, mo souhaite tous bane musulmans de par le monde, ainsi ki mo bane disciples dans bane différents pays du monde, ene « **Naya Saal Mubarak** ». Ki Allah fer zot tous *Mubarak*, et retire tous zot bane difficultés, et accorde zot tous zot bane *duahs* ki Halal et ki ena l'empreinte de la miséricorde lor là, et ki Allah gagne pitié de l'humanité et protège nous tous, la race humaine de toutes sortes kalités fléaux, tel que Coronavirus (COVID-19), la drogue, bane maladies et bane les autres virus mortels. Ki Allah protège l'humanité et fer zot reconnaite la véracité de l'islam, le Sahih al Islam et reconnaite la véracité de nous Nabi Kareem, Hazrat Muhammad (saws). Ki Allah puni ou change les cœurs de tous bane ki rode calomnier nous Nabi Kareem (saws). Allah guette bane les cœurs. Si bane les cœurs ena la capacité et la volonté pour cherche et reconnaite la vérité, alors Allah pou envoie lors zot So la lumière, mais si zot plonger dans piège de Shaytane et pas rode reforme zot même après ki zot fine recevoir le message d'Allah, le message de l'islam, alors li bien malheureux pour zot ki la malédiction d'Allah et So punition réserver pou zot. Mais Allah dans So pouvoir aussi, Li capave change bane les cœurs pareil couma nous pou trouver au cours du Khutba Jummah d'aujourd'hui lors 7^{ème} partie ki consacrer lors le sujet de « **duahs** ».

Donc, Allah (swt) fine donne moi le *Tawfiq* pour mo continuer mo Khutba lors « *duahs* » ki Hazrat Muhammad (saws) ti pé faire. Mo fine lire deux versets dans Quran Shariff et cite ene Hadith kot sa capave faire sakaine parmi nous réfléchi et conne valeur *duahs* kot nous bizin pense Allah (swt) matin et soir (faire So éloges et kot ou pou gagne la miséricorde d'Allah ki pou enveloppe avec ou et ene *Sakina* [tranquillité] déssane lors ou et lors là, Allah (swt) mentionne ou auprès de bane ki pé trouve Allah.

Faire éloges d'Allah, tourne vers Allah, demande Li, mette ou bane problèmes devant Li parski c'est Li-même Qui Le Plus Puissant, c'est Li Qui ena tout pouvoir et Li pas laisse So serviteur retourne les mains vides.

Tous les temps, Allah (swt) Li là pou réponne ou l'appel, mais ou aussi bizin faire zéffort, et prend patience pour céki ou pé demander et chercher ; c'est Allah même Qui pour donne ou sa, mais ou aussi bizin mette ou full confiance lors Allah, prend patience pour ki ou gagne ene jolie récompense, *Insha-Allah*.

Donc, mo continuer lors nous bien-aimé prophète Hazrat Muhammad (pbuh) so bane *duahs* et acceptation de sa bane *duahs* là. Dans bane Hadiths de Bukhari et Muslim ena la mention de l'acceptation de *duahs* de Hazrat Muhammad (saws) concernant Hazrat Abu Huraira (ra). Al-A'raj fine rapporté ki Abu Huraira (ra) fine dire: « *Zot penser ki Abu Huraira rapporte beaucoup bane paroles du Messenger d'Allah (saws); (Mette sa dans zot l'esprit) ki c'est Allah Qui tenir compte de tout zaffaire. Mo ti ene dimoune misère et mo ti pé reste tous les temps dans service de Rassoollullah (saws) kot mo ti pé contente moi avec bane simple nourriture [ki mo ti pé gagner], tandis ki bane Muhajirine ti pé reste occupé avec bane transactions dans bazar; tandis ki bane Ansar ti pé occuper avec zot bane propriétés [et l'argent].*

Ene jour Hazrat Muhammad (saws) fine dire: « *Ki sanlà pou talle so voile/ la toile/ vêtement ; celui ki pour faire sa pas pour oublier tout céki li fine tende moi dire. »* Alors Hazrat Abu Huraira (ra) fine rapporté : « *Mo fine talle mo voile jusqu'à ki li raconte kitchose. Mo fine ensuite presse li contre moi [contre mo la poitrine] ; donc jamais mo fine oublier saki mo fine tender de li. »* (Muslim)

Donc, sa zaffaire ki Hazrat Abu Huraira (ra) fine rapporte beaucoup bane paroles de Hazrat Muhammad (saws) là, li pas ene zaffaire ordinaire.

Li paraite ene zaffaire impossible pour rappelle tous sa bane Hadiths là pareil couma Hazrat Abu Huraira (ra) fine faire li. Mais sa c'est ene résultat miraculeuse de sa *duah* ki Hazrat Muhammad (saws) fine faire là. Hazrat Muhammad (saws) rapporter ki celui ki pour talle so voile, pas ou oublier nannié de saki li dire et Hazrat Abu Huraira (ra) fine faire exactement couma Hazrat Muhammad (saws) fine donne l'instruction, et donc, jamais li fine oublier saki li fine tender de Hazrat Muhammad (saws).

Hazrat Abu Huraira (ra) fine aussi rapporte ene *duah* ki Hazrat Muhammad (saws) fine fer et ki fine accomplir à propos de so maman. Dans Sahih Muslim, *Kitab*

Faza'il-e-Sahaba, li dire : Mo maman ti ene idolâtre et mo ti pé appelle li vers l'islam. Ene jour, kan mo ti pé cause islam avec li, li fine dire moi bane mauvais paroles lors Hazrat Muhammad (saws), ki mo pas fine content. Mo fine pleurer et mo fine alle kot Hazrat Muhammad (saws) et mo fine dire li: « *Ô Messenger d'Allah, mo ti appelle mo maman vers l'islam mais en réponse li fine dire moi bane paroles lors ou, ki mo pas fine content ditout. Faire duah ki mo maman accepter l'islam.* » Hazrat Muhammad (saws) fine faire sa *duah* là : « **Allahumma ahde Umma Abi Huraira.** » [*O Allah, guide maman de Abu Huraira*].

Hazrat Abu Huraira (ra) dire : Kan mo fine tende sa *duah* là, avec contentement mo fine retourne kot mo maman, et mo fine arrive kot la porte et la porte ti fermer. Mo maman fine tende mo pas, et li fine dire moi reste kot mo été. Mo fine tende de l'eau tomber. Li ti pé faire *Ghusl* [prend so grand bain], et kan li fine fini mette so linge li fine ouvert la porte et dire moi : « *Ô Abu Huraira, mo donne témoignage péna personne pour adorer aparte Allah et ki Muhammad (saws) li le serviteur et prophète d'Allah.* »

Hazrat Abu Huraira (ra) rapporté ki li fine retourne kot Hazrat Muhammad (saws) et li ti pé pleurer encore. Mais cette fois-ci c'était bane larmes de contentement. Li dire Hazrat Muhammad (saws) : « *O Messenger d'Allah, Allah fine accepter ou duah et fine guide mo maman.* » Hazrat Muhammad (saws) fine faire louanges d'Allah et fine dire bane paroles de bien [bane bons paroles].

Hazrat Abu Huraira (ra) dire : Mo fine demande le Prophète d'Allah pour faire sa *duah* là pour nous [pour moi et mo maman], ki tout bane croyants [*Mumineen*] content moi et mo maman et ki Li mette l'amour de bane croyants dans moi et mo maman nous les cœurs. Hazrat Muhammad (saws) fine faire sa même *duah* et n'importe kan ene *Momin* [croyant] tende à propos de moi, même si li pas fine trouve moi, li gagne l'amour pour moi.

Donc, li très important pou mentionne aussi sa bane anecdotes là kot Allah accepter bane *duahs* de Hazrat Muhammad (saws) toute suite et sa ti augmente *Imaan* (la foi) de bane *Sahaba Karaam*. Et maintenant mo pou mentionne quelques *duahs* de Hazrat Muhammad (saws) ki nous aussi nous capave profite de sa et nous rapproche de Allah et cherche So l'exaucement [l'acceptation] de sa bane *duahs* là à travers nous confiance dans Li et So capacité pou réalise sa bane *duahs* là.

Allahumma zidnaa wa laa tounqisna wa akrimnaa wa laa tahinnaa wa'atinaa wa laa tahrinnaa wa aathirnaa wa laa touthir alaynaa warda annaa [Ô Allah ! *Accorde-nous To du bien et pas réduire li pour nous. Honore-nous et pas humilier nous, donne nous et pas prive nous, chéris-nous et pas préfère quiconque ki nous, sois satisfait de nous*]. (Tirmidhi)

Allahumma laka aslamtou wa bika aamtou wa alaika tawakkaltou wa ilaika anabtou wa bika khaasamtou. [Ô Allah ! *Mo soumette moi à Toi, mo croire en Toi et lors Toi mo dépanne et vers Toi mo retourner et c'est par Toi ki mo disputer (lutter pour gagne ene succès)*]. (Muslim)

Allahumma innaa nasalouka min khayri maa saalaka minhou nabiiyouka mouhammadoun wa na'oudhou bika min charrimas ata' aadha minhou nabiiyouka Mouhammadoun, wa antal-Mous' aanou wa aalaikal balaghoun wa laahawla wa laa qouwwata illaa bi-ilaahi. [Ô Allah ! *Nous demande Toi du bien de ce ki To Messenger, Muhammad (saws) fine demande Toi et nous cherche refuge auprès Toi contre le mal ki To Messenger, Muhammad (saws) fine demande refuge. C'est à Toi ki (nous) besoin cherche secours, et c'est Toi ki accorde nous sa. Péna aucaine puissance, ni force excepter par Allah*]. (Tirmidhi)

Allahumma tahhir qalbi mina ni faqi wa amali mina-r-ri-a-i wa lisani minal kadhibi wa ayni minal khiyaanati fa innaka ta'alamou kha-inatal-a'youni wa ma toukhfi-s-soudour. [Ô Allah ! *Purifie mo le cœur de l'hypocrisie, mo action de Riya (montrer lizié dimounes), mo la langue dépi mensonge, mo lizié dépi la déloyauté car Toi To conne le moindre regard ki trahi et c'est ki cassiette dans les cœurs*]. (Al-Hakim)

Ena ene anecdote intéressant kot Hazrat Muhammad (saws) fine faire *duah*, so *duah* fine accepter toute suite. À propos de Surraqua nous fine tende beaucoup des fois et c'était de l'époque de *Hijrat*. C'est ene longue Hadith, mais mo pour présente ou ene ti partie là-dans.

Dans Bukhari, *Kitab'ul-Manaqib*, Hazrat Abu Bakr Siddique (ra) rapporté : « Ensuite nous fine alle dans direction soleil et Surraqua bin Malik ti pé suivre nous. Mo fine dire : « Ô prophète d'Allah, li pé suivre nous. » Alors, Hazrat Muhammad (saws) fine dire : « **La Tahran Innallaha ma'a na.** » [Pas bizin

tracasser, Allah avec nous]. Certainement Allah (swt) avec nous. Ensuite, Hazrat Muhammad (saws) fine faire *bad-duah* pour li et so cheval fine rentre dans du sable jusqu'à so ventre. En fait deux la patte avant de cheval là fine alle par devant et ti paraite couma dire cheval là ti lors so ventre. Ene rapporteur, Zuhair ena doute lors là ; li dire ki pas tout le cheval ki fine rentre dans du sable, mais c'est seulement so deux la pattes ki fine alle devant, et ça fine paraite coumsa. Sur ce, Surraqua bin Malik fine dire : « *Ene d'entre sa deux là fine faire bad-duah pou moi.* » Li pas ti reconnaite statut de Hazrat Muhammad (saws) et li fine ajoute Hazrat Abu Bakr aussi là-dans.

Mais en fait c'était *duah* de Hazrat Muhammad (saws). Li fine demander : « *Faire duah pou moi ; Allah Li certainement zot aide. Mo délaisse sa raison pour laquelle mo ti pé suivre zot là.* »

Hazrat Muhammad (saws) fine faire *duah* pour li, et so cheval fine arrête tomber. Ensuite, Hazrat Abu Bakr (ra) rapporter ki Surraqua bin Malik ti pé dire bane dimounes ki zot pas fine alle dans sa direction là et li ti pé rappelle bane ki ti pé alle dans zot direction. C'est pas Abu Bakr ki fine dire li cause menti, c'est li même sa, mais de toute façon li ti dans ene société d'idolâtrie. Abu Bakr (ra) dire ki Surraqua bin Malik fine accompli so promesse ki li pour retourner et li fine retourner.

Avant mo terminer, mo partage zot ene deux rêves ki relier, ene après l'autre et ki fine faire par ene madame dynamique, Madame Anjana ki régulièrement traduire mo bane Khutba Jummahs et autres matériels du Jamaat en Malayalam. Quoique li de foi hindoue, mais Allah (twa) pé donne li bane signes et bane rêves bien important, et mo faire *duahs* ki Allah béni li et so la famille pou reconnaite et accepter sa bane signes et Manifestation Divine de sa siècle là et montrer li le chemin éclairer de l'Islam, ene Islam (soumission) ki pour guide et préserve so lé cœur toujours lors le chemin droit.

Donc, semaine avant, li fine trouve dans so premier rêve, ki c'était ene jour de Eid dans nous Masjid de Mathra, et tellement ti ena beaucoup dimounes ki pas pé capave même compter, et dans sa moment là, ti ena Namaz/ Salaat et alors li pas fine capave zoine aucaine dimoune ki li conner, et ni li fine gagne de quoi manger, même kan li fine alle dans maison avoisinant parski zot tout ti pé garde Roza.

Le deuxième jour, li fine trouve ene nouvo rêve: encore ene fois, ti ene jour de Eid dans même Masjid, et ti ena beaucoup dimounes dans l'enceinte et environ de nous Masjid ki fine vini pou faire Namaz. Alors mo cher disciple Sulfikar Ali Saheb fine vini et fine demande li si li fine fini manger. Et ensuite, madame du Amir Sahib Jamaluddin Sahib, ki appelle Sofiya Sahiba fine vine zoine li parski li fine rappelle ki Madame Anjana pou gagne faim vers 1 heure et demi de l'après-midi, et même alors, Namaz ti encore pé faire dans Masjid kot ti ena beaucoup dimounes présent.

C'est bane très joli rêves ki Allah fine montrer li et ki relia ene après l'autre, et mo faire *duah* ki Allah ouvert so lé cœur à l'Islam et faire li gagne sa Eid de la bénédiction de la Manifestation Divine de sa siècle là. *Insha-Allah, Ameen*. Ena plusieurs mo bane les autres disciples couma Sulfikar Ali Sahib dans Kerala et nous bane membres de Tamil Nadu fine faire encore bane jolis rêves.

Donc, mo arrête ici même. Mo faire *duah* ki Allah (swt) donne moi le *Tawfiq* pour continuer lors sa même sujet ki bien important en ce moment, c'est « *duahs* ».

Ki Allah (swt) enveloppe nous avec So miséricorde et déssane ene tranquillité dans nous les cœurs, *Ameen, Summa Ameen, Yaa Rabboul Aalameen*. Encore ene fois, mo souhaite zot tous : **NAYA SAAL MUBARAK**. Ki Allah fer zot Mubarak kot zot reconnaite la vérité de la Manifestation Divine de sa l'époque là et bane ki fine fini déjà reconnaite et accepter So bane signes, et Messenger [le Khalifatullah de sa siècle là], ki Allah faire zot reste ferme et sincère lors So droit chemin. Ki Allah fer de sa nouvo l'année Islamique 1442 Hijri ene l'année Mubarak et rempli de So bénédictions. *Ameen, Summa Ameen, Yaa Rabboul Aalameen*.